



**Broj: 02-50-1-16-43/10**

**Sarajevo, 23. 2. 2010.**

**ZAPISNIK**

**43. sjednice Doma naroda**

**Parlamentarne skupštine Bosne i Hercegovine,**

**održane 23. 2. 2010. godine**

Sjednica je počela u 11,15 sati.

Sjednicom je predsjedavao Sulejman Tihić, predsjedavajući Doma naroda Parlamentarne skupštine BiH.

Sjednici je prisustvovalo 13 delegata.

Delegati Mladen Ivanić i Ilija Filipović opravdali su odsustvo.

Osim delegata, na sjednici Doma naroda bili su predstavnici: Vijeća ministara BiH, međunarodnih organizacija te sredstava javnog informiranja.

Nakon rasprave u kojoj su učestvovali Hazim Rančić, Dušanka Majkić i Branko Zrno, Dom naroda jednoglasno je usvojio sljedeći izmijenjeni

**DNEVNI RED**

1. Odgovori na delegatska pitanja i delegatska pitanja;
2. Usvajanje Zapisnika 42. sjednice Doma naroda;
3. Prijedlog zakona o duhanu Bosne i Hercegovine (drugo čitanje), predlagač: Vijeće ministara BiH;
4. Prijedlog zakona o izmjenama i dopunama Zakona o carinskoj tarifi Bosne i Hercegovine (drugo čitanje), predlagač: Vijeće ministara BiH;
5. Prijedlog zakona o zaštiti novih sorti bilja u Bosni i Hercegovini (drugo čitanje), predlagač: Vijeće ministara BiH;

6. Prijedlog zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu (prvo čitanje), predlagač: Vijeće ministara BiH;
7. Prijedlog zakona o izmjenama Zakona o klasifikaciji djelatnosti u Bosni i Hercegovini (prvo čitanje), predlagač: Vijeće ministara BiH;
8. Prijedlog zakona o izmjenama i dopunama Zakona o Javnom radiotelevizijskom sistemu Bosne i Hercegovine (prvo čitanje), predlagač: Vijeće ministara BiH;
9. Prijedlog zakona o izmjenama i dopunama Zakona o Javnom radiotelevizijskom servisu Bosne i Hercegovine (prvo čitanje), predlagač: Vijeće ministara BiH;
10. Prijedlog zakona o izmjenama i dopunama Zakona o komunikacijama (prvo čitanje), predlagač: Vijeće ministara BiH;
11. Prijedlog zakona o autorskim i srodnim pravima (prvo čitanje), predlagač: Vijeće ministara BiH;
12. Prijedlog zakona o kolektivnom ostvarivanju autorskih i srodnih prava (prvo čitanje), predlagač: Vijeće ministara BiH;
13. Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini (prvo čitanje), predlagač: Vijeće ministara BiH;
14. Razmatranje Godišnje platforme o obavještajno-sigurnosnoj politici s Mišljenjem Zajedničke komisije za nadzor nad radom Obavještajno-sigurnosne agencije Bosne i Hercegovine, predlagač: Predsjedništvo BiH;
15. Razmatranje zaključka Zajedničke komisije za ljudska prava, prava djeteta, mlade, imigraciju, izbjeglice, azil i etiku, usvojen na 18. sjednici Zajedničke komisije, održanoj 5.2.2009.;
16. Izbor tri člana Upravnog odbora Agencije za razvoj visokog obrazovanja i osiguravanje kvaliteta na period od tri godine (prijedlog jedinstvene rang-liste kandidata Privremene zajedničke komisije oba doma PSBiH);
17. Imenovanje tri člana iz Doma naroda PSBiH u Komisiju za izbor i praćenje rada Agencije za prevenciju korupcije i koordinaciju borbe protiv korupcije;
18. Davanje saglasnosti za ratifikaciju Sporazuma između Ministarstva vanjskih poslova BiH i Federalnog ministarstva evropskih i međunarodnih poslova Republike Austrije o saradnji u oblasti razvoja;
19. Davanje saglasnosti za ratifikaciju Ugovora o kreditu za projekat izgradnje postrojenja za desumporizaciju gorivnih plinova za termoelektranu Ugljevik između Japanske agencije za međunarodnu saradnju i Bosne i Hercegovine;

20. Davanje saglasnosti za ratifikaciju Ugovora o zajmu i projektu između KfW, Frankfurt na Majni, i Bosne i Hercegovine i Republike Srpske i grada Banje Luke - Vodosnabdijevanje i kanalizacija u gradu Banjoj Luci (komponenta 1: vodosnabdijevanje);
21. Davanje saglasnosti za ratifikaciju Ugovora o finansiranju i projektu između KfW, Frankfurt na Majni, i Bosne i Hercegovine i Republike Srpske i grada Banje Luke – Gradski sistem vodosnabdijevanja i odvođenja otpadnih voda u gradu Banjoj Luci (komponenta 2: sistemi za odvođenje otpadnih voda);
22. Davanje saglasnosti za ratifikaciju Sporazuma o zajmu između Bosne i Hercegovine koju zastupa Ministarstvo finansija i trezora BiH i Mađarske izvozno-uvozne banke za projekat - Tretman otpadnih voda u općini Tuzla;
23. Davanje saglasnosti za ratifikaciju Sporazuma između Bosne i Hercegovine i Češke Republike o izbjegavanju dvostrukog oporezivanja i sprečavanju utaje poreza na dohodak i imovinu;
24. Davanje saglasnosti za ratifikaciju Sporazuma između Vijeća ministara BiH i Vlade Federativne Republike Brazil o oslobađanju od viza za nosioce diplomatskih, zvaničnih ili službenih pasoša;
25. Davanje saglasnosti za ratifikaciju Amandmana na Ustav Međunarodne organizacije rada iz 1997. godine.

#### **Ad. 1. Odgovori na delegatska pitanja i delegatska pitanja**

Odgovore na delegatska pitanja dobili su:

Ivo Miro Jović, na pitanje postavljeno na 39. i 40. sjednici Doma naroda,

Hazim Rančić, na pitanje postavljeno na 39. i 42. sjednici Doma naroda,

Dušanka Majkić, na pitanje postavljeno na 40. sjednici Doma naroda, i na inicijativu postavljenu na 42. sjednici Doma naroda,

Drago Ljubičić, na pitanje postavljeno na 42. sjednici Doma naroda,

Sulejman Tihić, na pitanje postavljeno na 40. sjednici Doma naroda,

Zoran Koprivica, na pitanje postavljeno na 40. sjednici Doma naroda,

Božo Ljubić, na pitanje postavljeno na 39. sjednici Doma naroda i

Slobodan Šaraba, na pitanje postavljeno na 42. sjednici Doma naroda.

Delegat Ivo Miro Jović izjasnio se da je dobio odgovor na postavljeno pitanje od Centralne izborne komisije BiH a ne i od Ustavnog suda Federacije BiH koji je također trebalo da dostavi odgovor.

Delegat Hazim Rančić izjasnio se da je nezadovoljan odgovorom koji je dobio na pitanje postavljeno na 39. sjednici, a zatražio je da i ostale institucije dostave odgovor na pitanje postavljeno na 42.sjednici.

Delegat Dušanka Majkić izjasnila se da je zadovoljna dobivenim odgovorom ali ne i onim što je uradio Institut za nestala lica.

Delegat Dušanka Majkić izjasnila se da je zadovoljna dobivenim odgovorom na podnesenu inicijativu te je u vezi s tim predložila usvajanje zaključka kojim se obavezuju institucije BiH koje nisu dostavile odgovor na delegatska pitanja da to učine u roku od 15 dana.

Delegati Drago Ljubičić i Slobodan Šaraba izjasnili su se da su nezadovoljni dobivenim odgovorima na postavljena pitanja.

Delegati Sulejman Tihić i Zoran Korivica izjasnili su se da su djelimično zadovoljni dobivenim odgovorima na postavljena pitanja.

Delegat Božo Ljubić istakao je da će se na sljedećoj sjednici Doma naroda izjasniti da li je zadovoljan dobivenim odgovorom na postavljeno pitanje.

**Delegat Adem Ibrahimpašić** postavio je sljedeće pitanje Ministarstvu vanjske trgovine i ekonomskih odnosa BiH i Vijeću ministara BiH.

Bosna i Hercegovina je mala zemlja i ima tržište s ukupno 51.000km<sup>2</sup> i 3,85 mil.stanovnika. Kao takva, nije u mogućnosti voditi „ekonomiju količina“, tj. velikih serija već „ekonomiju kvaliteta“, tj. malih serija koristeći pri tome sve svoje komparativne prednosti. Isto tako nije ni pretjerano likvidna pa je i to prisiljava na male proizvodne serije.

Kao takva, Bosna i Hercegovina usmjerena je na proizvodnju za izvoz. A da bi izvozila mora ino tržište prihvatiti robe iz BiH. Da bi ino tržište prihvatilo bh. robu, treba ga prethodno upoznati. Zato me čudi da BiH i ono malo sredstava što izdvaja kroz budžet za ino prezentaciju svojih roba većim dijelom potroši u Bosni i Hercegovini.

Zato pitam Ministarstvo vanjske trgovine i ekonomskih odnosa BiH zašto se sredstva namijenjena sajamskim priredbama troše za finansiranje domaćih sajamskih priredbi i zašto nema plana ino nastupa bh. privrede. Pa zar nam nisu bitna tržišta npr. Rusije, Ukrajine pa ni CEFTE, EU itd?

Bilo bi veoma bitno da entitetske komore i Vanjskotrgovinska komora BiH, skupa s MVTEOBiH, naprave plan nastupa bh. privrede u inozemstvu i realiziraju ga, a sve s ciljem podsticanja izvoza.

**Delegat Hilmo Neimarlija** postavio je sljedeće pitanje: Vladi Federacije BiH, Ministarstvu okoliša i turizma i Ministarstvu za poljoprivredu, šumarstvo i vodoprivredu

Uključivanje Bosne i Hercegovine u Evropsku uniju pretpostavlja primjenu evropskih ekoloških zakona i standarda. Nažalost, poznato je da je Bosna i Hercegovina na posljednjem mjestu u regiji u zaštiti okoliša i upravljanja otpadom. Također je poznato da je „Prevent“ u Visokom od svog osnivanja najagresivniji i najmanje kontrolirani proizvođač organskog otpada i zagađenja zraka u našoj zemlji. Uprkos javno iskazanim zahtjevima institucija i pojedinaca, koji su utemeljeni u pravu na pristup informacijama o okolišu koje je zagantirano međunarodnim konvencijama, iz Vlade Federacije BiH nije javnosti nikada pružena oficijelna informacija o dodjeli okolišne i vodoprivredne dozvole za rad „Preventa“ ni oficijelna informacija o zakonskoj proceduri i garancijama na osnovu kojih su te dozvole dodijeljene. Na isti način su tražene i izostale su zvanične Vladine informacije o tome koliko se stvarno poštuju zakonske norme u procesima proizvodnje i upravljanja otpadom u „Preventu“ i koje su konkretno nepravilnosti u radu „Preventa“ utvrdili i sankcionirali inspektori Federalne uprave za inspekcijske poslove. Od Ministarstva okoliša i turizma i Ministarstva poljoprivrede, šumarstva i vodoprivrede u Vladi Federacije BiH tražim odgovore na sljedeća pitanja:

1. Raspolaze li „Prevent“ u Visokom potrebnim dozvolama za rad, i ako raspolaze, jesu li te dozvole dodijeljene u zakonskoj proceduri i s neophodnim garancijama poštivanja zakona u njihovom korištenju?
2. Poštuju li se zakonske norme u procesima proizvodnje i upravljanja otpadom u „Preventu“, i ako se poštuju, koje su nepravilnosti u radu „Preventa“ do sada ustanovili i kako su ih sankcionirali inspektori Federalne uprave za inspekcijske poslove?

**I delegat Hilmo Neimarlija** postavio je sljedeće pitanje Ministarstvu rada i socijalne politike.

Tridesetog novembra prošle godine 28 radnika Tvornice „Prevent“ u Visokom zatražilo je ljekarsku pomoć u Domu zdravlja u Visokom. Po medijskim predstavljajima ovaj nezapamćeni slučaj kolektivne oboljelosti, traume ili neuroze, bio je posljedica teških uslova za rad i iscrpljujućeg prekovremenog rada. Šta je Ministarstvo rada i socijalne politike Federacije BiH preduzelo na rasvjetljavanju ovog slučaja i otklanjanju uzroka za moguće nove ovakve i slične kolektivne nevolje radnika.

**Delegat Ivo Miro Jović** postavio je sljedeće pitanje Ministarstvu komunikacija i prometa BiH, Radioteleviziji Bosne i Hercegovine i Regulatornoj agenciji za komunikacije BiH.

Čije je vlasništvo Radio 202 i po kjeom zakonu radi?

Ko je odobrio frekvenciju za ovaj radio i kada i koliko ima zaposlebnih na ovom radiju?

**Delegat Zoran Koprivica** postavio je sljedeće pitanje Vijeću ministara BiH:

Evidentno je da su Banja Luka, Mostar, Tuzla, Bihać, Doboj, Bijeljina, Trebinje, Prijedor, Široki Brijeg, Zenica, Brčko kao veći politički i privredni centri u BiH značajno zapostavljeni, kada je riječ o raspoređivanju sjedišta državnih institucija u BiH. O ustavnom principu ravnopravnosti entiteta, kada se riječ o ovim pitanjima, jasno je da se ne može ni govoriti. To jasno upućuje na sliku o BiH kao potpuno centraliziranoj zemlji jer se sjedište preko 90 % njenih institucija nalazi u Sarajevu.

Stoga tražim da Vijeće ministara BiH sačini i u poslovničkom roku dostavi Parlamentarnoj skupštini BiH :

Pregled svih formiranih državnih institucija BiH s naznačenim sjedištem i njihovim eventualnim organizacionim dijelovima u drugim mjestima te broju zaposlenih u njima;

**Delegat Dušanka Majkić** postavila je sljedeće pitanje Uredu visokog predstavnika u BiH.

1. Šta namjerava uraditi visoki predstavnik da bi se ispravilo višegodišnje kršenje Ustava FBiH u pogledu etničke raspodjele šest ključnih pozicija na federalnom nivou, od kojih dvije moraju pripadati predstavnicima srpskog naroda?
2. Da li visoki predstavnik namjerava preduzeti bilo kakve sankcije prema odgovornima u Federaciji BiH zbog višegodišnjeg kršenja Ustava?

3. Kada će visoki predstavnik odgovoriti na moja delegatska pitanja, postavljena na 31. (18.6.2009.) i 35. sjednici (15.9.2009.) Doma naroda Parlamentarne skupštine BiH?

**Delegat Dušanka Majkić** također je ponovila pitanja postavljena na 31. sjednica, od 18.6.2009., i na 34. sjednica, od 15.9.2009.

Kada će OHR/EUSR početi plaćati porez na plaće i doprinose za svoje zaposlene u punom iznosu i time prestati s klasičnom utajom poreza i doprinosa na plaće u Republici Srpskoj i Federaciji BiH?

Zašto do danas niste zatražili krivičnu istragu protiv Radislava Jovičića i zašto dokazi protiv njega nisu prosljeđeni direktoru SIPA-e, Vijeću ministara BiH i Tužilaštvu BiH?

**Delegat Slobodan Šaraba** postavio je sljedeće pitanje Vijeću ministara BiH:

Kada će Vijeće ministara BiH opremiti laboratoriju i izvršiti neophodnu obuku kadrova za praćenje rezidua određenih supstanci u proizvodima životinjskog porijekla?

**Delegat Alma Čolo** postavila je sljedeće pitanje Ministarstvu pravde BiH i Visokom sudskom i tužilačkom vijeću BiH:

Uvažavajući nezavisnost i nepristrasnost pravosuđa, a u kontekstu poštivanja člana 6. Evropske konvencije za zaštitu ljudskih prava i osnovnih sloboda, postavljam sljedeće pitanje Ministarstvu pravde BiH i Visokom sudskom i tužilačkom vijeću BiH:

Koliko u prosjeku vremenski traju parnični postupci pred sudovima u Bosni i Hercegovini, a posebno koliko u prosjeku traju drugostepeni postupci, tj. postupci po žalbi u parničnom postupku pred kantonalnim sudovima u Federaciji BiH i okružnim sudovima u Republici Srpskoj.

Dom naroda **jednoglasno je usvojio zaključak** delegata Dušanke Majkić koji glasi:

Obavezuju se institucije BiH koje nisu dostavile odgovor na delegatska pitanja da, u roku od 15 dana, Domu naroda PSBiH dostave odgovore na postavljena delegatska pitanja. Dom naroda zahtijeva da institucije navedu i razloge zbog kojih odgovori na delegatska pitanja nisu pravovremeno dostavljeni, te ko je zbog toga odgovoran.

## **Ad.2. Usvajanje Zapisnika 42. sjednice Doma naroda**

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je usvojio** Zapisnik 42. sjednice Doma naroda.

## **Ad.3. Prijedlog zakona o duhanu Bosne i Hercegovine (drugo čitanje), predlagač: Vijeće ministara BiH**

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Alma Čolo, Slobodan Šaraba, Dušanka Majkić, Adem Ibrahimpašić i Drago Ljubičić.

Dom naroda je, s 12 glasova “za” i jednim “suzdržanim” glasom, **usvojio** Zakon o duhanu Bosne i Hercegovine sa sljedećim amandmanima:

### **Amandman I.**

U članu 29. u stavu (1) riječi: „pravna lica“ zamjenjuju se riječima: „privredna društva“.

### **Amandman II.**

U članu 35. u stavu (2) riječi: „tj. stavljanja u promet“ brišu se.

### **Amandman III.**

U članu 45. stav (1). tačka c) iza riječi: „ako ne omogući“ dodaju se riječi: „organizatoru proizvodnje i“.

### **Amandman IV.**

U članu 45. stav (1). tačka f) riječi: „imalac radnje“ zamjenjuju se riječima: „proizvođač duhana“.

### **Amandman V.**

U članu 49. iza riječi: „koja se bave djelatnostima“ dodaje se riječ „proizvodnje“.

S obzirom da je Zakon usvojen u različitom tekstu od onog usvojenog u Predstavničkom domu, Dom naroda osnovao je Zajedničku komisiju za usaglašavanje teksta Zakona. Za članove Zajedničke komisije iz Doma naroda **imenovani su: Božo Ljubić, Adem Ibrahimpašić i Slobodan Šaraba.**



#### **Ad.4. Prijedlog zakona o izmjenama i dopunama Zakona o carinskoj tarifi Bosne i Hercegovine (drugo čitanje), predlagač: Vijeće ministara BiH**

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Alma Čolo, Dušanka Majkić, Božo Ljubić, Slobodan Šaraba, predstavnik predlagača Vilim Primorac, Drago Ljubičić, Adem Ibrahimpašić i Božo Rajić.

Dom naroda **jednoglasno je usvojio** Zakon o izmjenama i dopunama Zakona o carinskoj tarifi Bosne i Hercegovine s jednim amandmanom koji glasi:

##### **Amandman I.**

U članu 1. u naslovu TARIFNI ANEKS – TARIFNE KVOTE- žive životinje, meso i jestivi klaonički proizvodi , u koloni „ Ostali uslovi“ tekst stavova 6., 7., i 8. mijenja se i glasi:

„ Vijeće ministara BiH, u zavisnosti od situacije na domaćem tržištu, u konsultacijama s Vanjskotrgovinskom komorom, te privrednim komorama entiteta, može predlagati promjene pojedinih navednih omjera. Saglasnost daje Parlamentarna skupština BiH.

Vijeće ministara BiH može, uz suglasnost Parlamentarne skupštine BiH, a maksimalno dva puta godišnje ponoviti utvrđene kvote za pojedine tarifne oznake na osnovu dokaza o opravdanosti te odluke za privredu BiH.

Roba koja se stavlja u slobodan promet, uz korištenje uvoznih tarifnih kvota, podliježe carinskom nadzoru krajnje upotrebe. Između uvoznika i prerađivača ne može biti posrednika. „

#### **Ad.5. Prijedlog zakona o zaštiti novih sorti bilja u Bosni i Hercegovini (drugo čitanje) predlagač: Vijeće ministara BiH**

Predsjedavajući Doma naroda otvorio je raspravu o ovoj tački dnevnog reda. U raspravi je učestvovala Alma Čolo.

Dom naroda **jednoglasno je usvojio** Zakon o zaštiti novih sorti bilja u Bosni i Hercegovini u predloženom tekstu.

#### **Ad.6. Prijedlog zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu (prvo čitanje), predlagač: Vijeće ministara BiH**

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Alma Čolo, Dušanka Majkić, Ivo Miro Jović i Rudo Vidović, ministar prometa i komunikacija BiH.

Dom naroda **jednoglasno je usvojio u prvom čitanju** Prijedlog zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu.

**Ad.7. Prijedlog zakona o izmjenama Zakona o klasifikaciji djelatnosti u Bosni i Hercegovini (prvo čitanje), predlagač: Vijeće ministara BiH**

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Ivo Miro Jović, Dušanka Majkić i Zoran Koprivica.

Dom naroda **jednoglasno je usvojio u prvom čitanju** Prijedlog zakona o izmjenama Zakona o klasifikaciji djelatnosti u Bosni i Hercegovini.

**Ad.8. Prijedlog zakona o izmjenama i dopunama Zakona o Javnom radiotelevizijskom sistemu Bosne i Hercegovine (prvo čitanje), predlagač: Vijeće ministara BiH**

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Alma Čolo, Dušanka Majkić, Branko Zrno i Rudo Vidović, ministar prometa i komunikacija BiH.

Dom naroda **jednoglasno je usvojio u prvom čitanju** Prijedlog zakona o izmjenama i dopunama Zakona o Javnom radiotelevizijskom sistemu Bosne i Hercegovine.

**Ad.9. Prijedlog zakona o izmjenama i dopunama Zakona o Javnom radiotelevizijskom servisu Bosne i Hercegovine (prvo čitanje), predlagač: Vijeće ministara BiH**

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je usvojio u prvom čitanju** Prijedlog zakona o izmjenama i dopunama Zakona o Javnom radiotelevizijskom servisu Bosne i Hercegovine.

**Ad.10. Prijedlog zakona o izmjenama i dopunama Zakona o komunikacijama (prvo čitanje), predlagač: Vijeće ministara BiH**

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je usvojio u prvom čitanju** Prijedlog zakona o izmjenama i dopunama Zakona o komunikacijama.

**Ad.11. Prijedlog zakona o autorskim i srodnim pravima (prvo čitanje), predlagač: Vijeće ministara BiH.**

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Ivo Miro Jović, Dušanka Majkić i Lidija Vignjević, predstavnik predlagača.

Dom naroda **jednoglasno je usvojio u prvom čitanju** Prijedlog zakona o autorskim i srodnim pravima sa sljedećim zaključkom:

Zadužuje se Ustavnopravna komisija Doma naroda da, u saradnji sa Ustavnopravnom komisijom Predstavničkog doma, organizira i provede Javnu raspravu o Prijedlogu zakona o kolektivnom ostvarivanju autorskih i srodnih prava i Prijedlogu zakona o autorskim i srodnim pravima na koju će biti, putem sredstava informiranja, pozvana sva zainteresirana pravna i fizička lica s teritorije BiH.

**Ad . 12. Prijedlog zakona o kolektivnom ostvarivanju autorskih i srodnih prava (prvo čitanje), predlagač: Vijeće ministara BiH**

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je usvojio u prvom čitanju** Prijedlog zakona o kolektivnom ostvarivanju autorskih i srodnih prava sa sljedećim zaključkom:

- Zaduguje se Ustavnopravna komisija Doma naroda da, u saradnji sa Ustavnopravnom komisijom Predstavničkog doma, organizira i provede Javnu raspravu o Prijedlogu zakona o kolektivnom ostvarivanju autorskih i srodnih prava i Prijedlogu zakona o autorskim i srodnim pravima na koju će biti, putem sredstava informiranja, pozvana sva zainteresirana pravna i fizička lica s teritorije BiH.

**Ad.13. Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini (prvo čitanje), predlagač: Vijeće ministara BiH**

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Alma Čolo, Slobodan Šaraba, Dušanka Majkić, Božo Rajić i Rudo Vidović, ministar prometa i komunikacija BiH.

Dom naroda je, s **11 glasova “za” i jednim “suzdržanim” glasom, usvojio u prvom čitanju** Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini sa sljedećim zaključkom:

S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini, produžava se amandmanska faza za ovaj prijedlog zakona do 48 sati prije održavanja sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH na kojoj će biti razmatran.

**Ad.14. Razmatranje Godišnje platforme o obavještajno-sigurnosnoj politici s Mišljenjem Zajedničke komisije za nadzor nad radom Obavještajno-sigurnosne agencije Bosne i Hercegovine, predlagač: Predsjedništvo BiH**

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Božo Rajić, Dušanka Majkić i Hazim Rančić.

Dom naroda, s **dva glasa „za“, sedam glasova „protiv“ i četiri „suzdržana“ glasa, nije usvojio negativno** Mišljenje Zajedničke komisije. Na prijedlog Zajedničke komisije za nadzor nad radom Obavještajno-sigurnosne agencije BiH, jednoglasno je usvojen zaključak da se Godišnja platforma vrati Predsjedništvu Bosne i Hercegovine koje ju je odobrilo.

**Ad.15. Razmatranje zaključka Zajedničke komisije za ljudska prava, prava djeteta, mlade, imigraciju, izbjeglice, azil i etiku, usvojen na 18. sjednici Zajedničke komisije, održanoj 5.2.2009.**

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Slobodan Šaraba, Božo Rajić, Dušanka Majkić, Adem Ibrahimpašić, Branko Zrno, Alma Čolo i Hilmo Neimarlija.

Dom naroda je, s **deset glasova “za”, dva glasa “protiv” i jednim “suzdržanim” glasom, usvojio** Zaključak Zajedničke komisije za ljudska prava, prava djeteta, mlade, imigraciju, izbjeglice, azil i etiku koji glasi:

Parlamentarna skupština BiH traži pokretanje inicijative kod Ureda visokog predstavnika za prispitivanje svih odluka visokog predstavnika kojima su smijenjena određena lica ili da visoki predstavnik donese odluku kojom će to ovlaštenje prenijeti na Instituciju ombudsmena BiH ili neku drugu instituciju.

**Ad.16. Izbor tri člana Upravnog odbora Agencije za razvoj visokog obrazovanja i osiguravanje kvaliteta na period od tri godine (prijedlog jedinstvene rang-liste kandidata Privremene zajedničke komisije oba doma PSBiH)**

Predsjedavajući Doma naroda otvorio je raspravu o ovoj tački dnevnog reda. U raspravi je učestvovao Drago Ljubičić.

Dom naroda je, s 12 glasova “za” i jednim “suzdržanim” glasom, imenovao **Aidu Abadžić Hodžić, Vladu Majstorovića i Miljana Popića** za članove Upravnog odbora Agencije za razvoj visokog obrazovanja i osiguravanje kvaliteta na period od tri godine.

**Ad.17. Imenovanje tri člana iz Doma naroda PSBiH u Komisiju za izbor i praćenje rada Agencije za prevenciju korupcije i koordinaciju borbe protiv korupcije**

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je imenovao Sulejmana Tihića, Dušanku Majkić i Iliju Filipovića** u Komisiju za izbor i praćenje rada Agencije za prevenciju korupcije i koordinaciju borbe protiv korupcije.

Prije prelaska na razmatranje sljedećih tačaka dnevnog reda, predsjedavajući Doma naroda predložio je da se Dom izjasni o tome da se davanje saglasnosti za ratifikaciju za sve navedene tačke objedini, što je jednoglasno usvojeno.

Predsjedavajući Doma naroda otvorio je raspravu o ovim tačkama dnevnog reda. Nije bilo delegata prijavljenih za raspravu. Dom naroda jednoglasno je dao saglasnost za ratifikaciju:

- Ad.18. Davanje saglasnosti za ratifikaciju Sporazuma između Ministarstva vanjskih poslova BiH i Federalnog ministarstva evropskih i međunarodnih poslova Republike Austrije o saradnji u oblasti razvoja;**
- Ad.19. Davanje saglasnosti za ratifikaciju Ugovora o kreditu za projekat izgradnje postrojenja za desumporizaciju gorivnih plinova za termoelektranu Ugljevik između Japanske agencije za međunarodnu saradnju i Bosne i Hercegovine;**
- Ad.20. Davanje saglasnosti za ratifikaciju Ugovora o zajmu i projektu između KfW, Frankfurt na Majni, i Bosne i Hercegovine i Republike Srpske i grada Banje Luke - Vodosnabdijevanje i kanalizacija u gradu Banjoj Luci (komponenta 1: vodosnabdijevanje);**
- Ad.21. Davanje saglasnosti za ratifikaciju Ugovora o finansiranju i projektu između KfW, Frankfurt na Majni, i Bosne i Hercegovine i Republike Srpske i grada Banje Luke – Gradski sistem vodosnabdijevanja i odvođenja otpadnih voda u gradu Banjoj Luci (komponenta 2: sistemi za odvođenje otpadnih voda);**
- Ad.22. Davanje saglasnosti za ratifikaciju Sporazuma o zajmu između Bosne i Hercegovine koju zastupa Ministarstvo finansija i trezora BiH i Mađarske izvožno-uvozne banke za projekat - Tretman otpadnih voda u općini Tuzla;**
- Ad.23. Davanje saglasnosti za ratifikaciju Sporazuma između Bosne i Hercegovine i Češke Republike o izbjegavanju dvostrukog oporezivanja i sprečavanju utaje poreza na dohodak i imovinu;**
- Ad.24. Davanje saglasnosti za ratifikaciju Sporazuma između Vijeća ministara BiH i Vlade Federativne Republike Brazil o oslobađanju od viza za nosioce diplomatskih, zvaničnih ili službenih pasoša;**
- Ad.25. Davanje saglasnosti za ratifikaciju Amandmana na Ustav Međunarodne organizacije rada iz 1997. godine.**

Sjednica je završena u 14 sati.

Sastavni dio ovog zapisnika je neautorizirani transkript 43. sjednice Doma naroda.

**SEKRETAR**  
**DOMA NARODA**  
Marin Vukoja

**PREDSJEDAVAJUĆI**  
**DOMA NARODA**  
Sulejman Tihić

